

元明事類鈔

元明事類

總校官知縣臣繆琪

校對官中書臣李斯咏

騰錄監生臣姜士安

欽定四庫全書

元明事類鈔卷二十一

監察御史姚之駟撰

文學門一

經典

護九經石

元史楊璉真伽作浮圖于宋故宮取高宗

所書九經石刻以築基申屠致遠力拒之乃止

元儒經學

池北偶談孫退谷言元儒經學非後人所

及蓋元時天下有書院一百二十各以山長主之教子弟必經學明乃得入國學明初猶多通經人皆元遺逸也

棄註疏 今言洪武開科詔五經皆宗古註疏易兼程朱書蔡詩朱春秋左公羊穀梁程胡張禮記陳乃後盡棄註疏或曰始于頒五經大全時以為諸家說優者采入故耳然古註疏終不可廢也

分日讀經 文衡李舜樸東安人一意經術易詩書三

禮左傳分日讀之每六日一易

人稱五經 明紀臨江梁寅隱居教授就徵修書授以
官辭去四方士從之稱為梁五經吳中往哲記檢討
陳繼老而居吳多聞故實德尊行茂咸仰以為宗工
稱曰陳五經家

手寫經書 文徵明集王履吉于書無所不讀而尤詳
于羣經手寫經書時一再過

纂修大全 本朝徐乾學經解序明永樂時詔輯五經

四書性理大全徵海內名士開館東華門御府給筆
札是時胡廣諸大臣虛糜廩餼叨冒遷賚四書大全
則本倪士毅通義大成詩則襲劉瑾通釋春秋則襲
汪克寬纂疏勦竊藍本苟以塞責而已

兵間注易 元史余闕守安慶時羣盜環布闕居其中
少暇即注周易

易緯猶存 王禕叢錄宋大明中始禁讖緯之書唐以
來其學遂熄然唐志猶存九部今皆亡之而易緯乾

鑒度猶存

誦易乾卦 吾學編雪菴和尚靖難後為僧走重慶居
白龍山下昕夕誦經山人且謂誦佛經不知其誦
易乾卦也

一語功效 明通紀文皇諭胡廣等曰為學不可不知
易只內君子外小人一語人君用之功效不小

對榻析疑 吾學編白沙嘗以周易疑義質吳與弼與
弼曰過清河可叩龍潭老人白沙往謁適龍潭雨中

簑笠犁田即延至其家與之對榻信宿辨析疑義白
沙嘆服而去

說舉儲貳 明紀編年永樂中侍講王達侍皇太子進
講乾四爻舉儲貳為說太子召楊士奇問曰達不
含譏否士奇對曰此本宋儒胡瑗之說也曰常人得此
爻亦舉此說乎士奇曰程子云凡卦六爻人人有用
君有君用臣有臣用無所不通太子大悅

尤長于易 獻實蔡介夫明經而尤長于易觀其去銓

司而乞南曹卒脫淮南之禍所謂見幾而作者也

繹尚書 元史元明善為翰林學士仁宗詔節尚書經
繹其闕政要者以進書成每進一篇帝必稱善

出閣先讀 野記天順時皇太子出閣讀書上曰且讀
何書李賢對曰宜先大學尚書上曰書經有難讀者
賢對曰如二典三謨太甲伊訓說命諸篇明白簡易
可先講讀

改尚書註 明紀太祖以尚書咨義和惟天陰騭下民

二處蔡沈註誤命儒臣改正為書傳會選刊示天下
神童講書 明詩紀事李東陽舉神童召見講尚書大
義

秦焚不到 明文翔鳳伏生墓詩秦焚不到書生腹孔
壁重歸女史環

豳風圖 明紀事本末宣德中上閱內庫書畫得趙孟
頴豳風圖因賦詩一章召詞臣示之曰豳詩周公以
告成王使知稼穡艱難萬世人君皆當鑒此朕愛斯

圖為賦長句將揭于便殿之壁

一本于禮 方孝孺集春秋聖人用刑之書也而一本于禮

名講春秋 吾學編宋濂授太子經名講春秋左氏傳
公曰春秋褒善貶惡之書遵而行之賞罰適中天下
可定也

作要旨 楊士奇集金幼孜得春秋微旨仁宗在東宮
公專說春秋敷析簡明睿旨稱善命纂十二公行事

作春秋要旨以進

三禮尤深 元史熊朋來以周禮首薦鄉郡而元制周官不與設科治戴記者又鮮朋來屢以為言蓋朋來之學諸經中三禮尤深

制科所宗 元史補遺都昌陳澔承其家學深探禮奧著禮記襍說至今與程朱蔡胡傳義並為制科所宗顧其名跡稍晦未得從祀聖廡云

請刪禮記 名山藏解縉上封事論時政萬餘言其中

有曰禮記出于漢儒蕪襍尤甚宜及時刪改

上儀禮 吾學編劉有年洪武中為御史忤旨謫居通州讀書不懈得儀禮十八篇于州故家上之詔藏秘閣

即家錄上 元史類編吳澄居布水谷著孝經章句校次六經諸書程鉅夫請置澄所著書于國子監以資學者朝廷命有司即其家錄上

譯孝經 元史右丞以國字譯孝經進成宗曰此乃孔

子之微言命刻板模印

皆古樂章 吳澂泗經序錄風雅凡三百十一篇皆古

樂章

書籍

藝林庫 元史藝林庫藏貯書籍天厯三年所置

盡俸買書 虞集文董文用仕宦五十餘年祿俸之餘

盡以買書而家無饘粥之資

得書歸蜀 陸深漫鈔元至正初遣官求書東南異書

頗出時有蜀帥紐鄰之孫盡出其貲遍遊江南得書三十萬卷溯峽歸蜀

夢藏書 元好問集予家所藏書宋元祐以前物也往在鄉里侍諸父燕談每及家所有書必枚舉而問或買于某處傳之何人藏之幾年則欣然志之今雖散佚其綴緝裝裱籤題印識猶夢寐見之

識玉章 元史仁宗為太子遣使四方旁求經籍識以玉章命近侍掌之

墨莊 元史類編申屠致遠清修苦節聚書萬卷名曰
墨莊

橐駝負書 姚燧集參知政事賈守謙視政之暇未嘗
廢書從戎亦橐駝負書以行

至正珍秘 元史順帝刻小玉印以至正珍秘四字為
文凡秘書監所掌書皆識之

秘書監 元史秘書監秩五品掌歷代圖籍并陰陽禁
書卿四員延祐中參用宦者一人